

四庫全書

史部

欽定四庫全書

金史卷二十七

元中書右丞相總裁托克托等修

志第八

河渠

黃河

漕渠

盧溝河

游沱河

漳河

黃河金始克宋兩河悉界劉豫豫亡河遂盡入金境  
十年間或決或塞遷徙無定金人設官置屬以主其  
沿河上下凡二十五埽六在河南十九在河北埽設

巡河官一員雄武榮澤原武陽武延津五埽則兼汴  
事設黃汴都巡河官一員於河陰以蒞之懷州孟津子  
州及城北之四埽則兼沁水事設黃沁都巡河官一員  
於懷州以臨之崇福上下衛南淇上四埽屬衛南都  
河官則居新鄉武城白馬書城教城四埽屬濬滑都  
河官則處教城曹甸都巡河官則總東明西隄孟華  
城四埽曹濟都巡河官則司定陶濟北寒山金山四  
者也故都巡河官凡六員後又特設崇樞上下埽都

河官兼石橋使凡巡河官皆從都水監廉舉總統埽兵  
萬二千人歲用薪百一十一萬三千餘束草百八十三  
萬七百餘束樁杙之木不與此備河之恒制也大定八  
年六月河決李固渡水潰曹州城分流于單州之境九  
年正月朝廷遣都水監梁肅往視之河南統軍使宗室  
宗叙言大河所以決溢者以河道積淤不能受水故也  
今曹單雖被其患而兩州本以水利為生所害農田無  
幾今欲河復故道不惟大費工役又卒難成功縱能塞

之他日霖潦亦將清決則山東河患又非曹單比也又沿河數州之地驟興大役人心動搖恐宋人乘間構為邊患而肅亦言新河水六分舊河水四分今若塞新河則二水復合為一如遇漲溢南決則害於南京北決則山東河北皆被其害不若李固南築隄以防決溢為便尚書省以聞上從之三月拜宗叙為參知政事上諭之曰卿昨為河南統軍時嘗言黃河隄埽利害甚合朕意朕每念百姓凡有差調吏互為姦若不早計而迫期徵

歛則民增十倍之費然其所徵之物或委積經年至腐  
朽不可復用使吾民數十萬之財皆為棄物此害非細  
卿既參朝政凡類此者皆當革其弊擇所利而行之十  
一年河決王村南京孟衛州界多被其害十二年正月  
尚書省奏檢視官言水東南行其勢甚大可自河陰廣  
武山循河而東至原武陽武東明等縣孟衛等州增築  
隄岸日役夫萬一千期以六十日畢詔遣太府少監張  
九思同知南京留守事赫舍哩邈

小字阿  
卜薩

監護工作十

三年三月以尚書省請修孟津滎澤崇福埽堤以備水患上乃命雄武以下八埽並以類從事十七年秋七月大雨河決白溝十二月尚書省奏修築河堤日役夫一萬一千五百以六十日畢工詔以十八年二月一日發六百里內軍夫并取職官人力之半餘聽發民夫以尚書工部郎中張大節同知南京留守事高蘓董役先是祥符縣陳橋鎮之東至陳留潘崗黃河堤道四十餘里以縣官攝其事南京有司言乞專設埽官十九年九月

乃設京埽巡河官一員二十年河決衛州及延津京東埽瀾漫至歸德府檢視官南京副留守舒穆魯和卓言河水因今秋霖潦暴漲遂失故道勢益南行宰臣以聞乃自衛州埽下接歸德府南北兩岸增築堤以捍湍怒計工一百七十九萬六千餘日役夫二萬四千餘期以七十日畢工遂于歸德府叛設巡河官一員埽兵二百人且詔頻役夫之地與免今年稅賦二十一年十月以河移故道命築堤以備二十六年八月河決衛州堤壞



其城上命戶部侍郎王寂都水少監王汝嘉馳傳措畫  
備禦而寂視被災之民不為拯救乃專集衆以網魚取  
官物為事民甚怨嫉上聞而惡之既而河勢泛濫及大  
名上於是遣戶部尚書劉瑋往行戶部事從宜規畫黜  
寂為蔡州防禦使冬十月上謂宰臣曰朕聞凶宋河防  
一步置一人可添設河防軍數他日又曰比聞河水泛  
溢民罹其害者貲產皆空今復遣官於被災路分推排  
何耶右丞張汝霖曰今推排者皆非被災之處上曰雖

然必其鄰道也既鄰水而居豈無驚擾遷避者乎計其  
背產豈有餘哉尚何推排為十一月又謂宰臣曰河未  
決衛州時嘗有言者既決之後有司何故不令朕知命  
詢其故二十七年春正月尚書省言鄭州河陰縣聖后  
廟前代河水為患屢禱有應嘗加封號廟額今因禱祈  
河遂安流乞加褒贈上從其請特加號曰昭應順濟聖  
后廟曰靈德善利之廟二月以衛州新鄉縣令張蘆丞  
唐古騰格徹主簿溫都威赫以河水入城閉塞救護有

功皆遷賞有差御史臺言自來沿河京府州縣官坐視  
管內河防缺壞特不介意若令沿河京府州縣長貳官  
皆於名銜管勾河防事如任內規措有方能禦大患或  
守護不謹以致疎虞臨時聞奏以議賞罰上從之仍命  
每歲將泛之時令工部官一員沿河檢視於是以南京  
府及所屬延津封邱祥符開封陳留胙城杞縣長垣歸  
德府及所屬宋城寧陵虞城河南府及孟津河中府及  
河東懷州河內武陟同州朝邑衛州汲新鄉獲嘉徐州

彭城蕭豐孟州河陽溫鄭州河陰滎澤原武汜水濬州  
衛陝州閭鄉湖城靈寶曹州濟陰滑州白馬睢州襄邑  
滕州沛單州單父解州平陸開州濮陽濟州嘉祥金鄉  
鄆城四府十六州之長貳皆提舉河防事四十四縣之  
令佐皆管勾河防事初衛州為河水所壞乃命增築蘇  
門遷其州治至二十八年水息居民稍還皆不樂遷於  
是遣大理少卿康元弼按視之元弼還奏舊州民復業  
者甚衆且南使驛道館舍所在向以不為水備以故被

害若但修其堤之薄缺者可以無虞比之遷治所省數倍不若從其民情修治舊城為便乃不遷州仍勅自今河防官司怠慢失備者皆重抵以罪二十九年五月河溢于曹州小堤之北六月上諭旨有司曰比間五月二十八日河溢而所報文字如此稽滯水事最急功不可緩稍緩時頃則難固護矣十二月工部言營築河堤用工六百八萬餘就用埽兵軍夫外有四百三十餘萬工當用民夫遂詔命去役所五百里州府差顧於不差夫

之地均徵顧錢驗物力科之每工錢百五十文外日支官錢五十文米升半仍命彰化軍節度使內族裔都水少監大齡壽提控五百人往來彈壓先是河南路提刑司言沿河居民多困乏逃移蓋以河防差役煩重故也竊惟禦水患者不過堤埽若土功從實計料薪藁椿杙以時徵斂亦復何難今者築堤都水監初料取土甚近及其興工乃遠數倍人夫懼不及程貴價買土一隊之間多至千貫又許州初料薪藁十八萬餘束既而又配

四萬四千是皆常歲必用之物農隙均科則易輸納自  
今堤埽興工乞令本監以實計度量一歲所用物料驗  
數折稅或令和買於冬月分為三限輸納為便詔尚書  
省詳議以聞明昌元年春正月尚書省奏臣等以為自  
今凡興工役先量負土遠近增築高卑定功立限勝諭  
使人先知無令增加力役并河防所用物色委都水監  
每歲於八月以前先拘籍舊貯物外實闕之數及次年  
春工多寡移報轉運司計置於冬三月分限輸納如水

勢不常夏秋暴漲危急則用相隣埽分防備之物不足則復於所近州縣和買然復慮人戶道途泥淖艱于運納止依稅内科折他物更為增價當官支付違者並論如律仍令所屬提刑司正官一員馳驛監視體究如此則役作有程而河不失備制可之四年十一月尚書省奏河平軍節度使王汝嘉等言大河南岸舊有分流河口如可疏導足泄其勢及長堤以北恐亦有可以歸納排淪之處乞委官視之濟北埽以北宜創起月堤臣等



以為宜從所言其本監官皆以緒練河防故注以是職  
當使從汝嘉等同往相視庶免異議如大河南北必不  
能開挑歸納其月堤宜依所料興修上從之十二月勅  
都水監官提控修築黃河堤及令大名府差正千戶一  
員部甲軍二百人彈壓勾當五年春正月尚書省奏都  
水監丞田櫟同本監官講議黃河利害嘗以狀上言前  
代每遇古堤南決多經南北清河分流南清河北下有  
枯河數道河水流其中者長至七八分北清河乃濟水

故道可容三二分而已今河水趨北齧長堤而流者十餘處而堤外率多積水恐難依元料增修長堤與創築月堤也可於北岸牆村決河入梁山灤故道依舊作南北兩清河分流然北清河舊堤歲久不完當立年限增築大堤而梁山故道多有屯田軍戶亦宜遷徙今擬先於南岸王村宜村兩處決堤導水使長堤可以固護姑宜仍舊如不能疏導即依上開決分為四道竢見水勢隨宜料理尚書省以櫟等所言與明昌二年劉瑋等所

案視利害不同及令陳言人馮德興與標面對亦有不  
合者送工部議復言若遽於牆村疏決緣瀕北清河州  
縣二十餘處兩岸連亘千有餘里其隄防素不修備恐  
所屯軍戶亦卒難徙今歲先於南岸延津縣堤決堤洩  
水其北岸長堤自白馬以下定陶以上並宜加功築護  
庶可以遏將來之患若定陶以東三埽棄堤則不必修  
止決舊壓河口引導積水東南行流堤北張彪白塔兩  
河間礙水軍戶可使遷徙及梁山灤故道分屯者亦當

預為安置宰臣奏曰若遽從櫟等所擬恐既更張利害  
非細比召河平軍節度使王汝嘉同計議先差幹濟官  
兩員行戶工部事覆視之同則就令計實用工物量州  
縣遠近以調丁夫其督趣春工官即充今歲守漲及與  
本監官同議經久之利詔以知大名府事內族裔尚書  
戶部郎中李敬義充行戶工部事以參知政事胥持國  
都提控又奏差德州防禦使李獻可尚書戶部郎中焦  
旭於山東當水所經州縣築護城堤及北清河兩岸舊

有堤處別率丁夫修築亦就令講究河防之計他日上  
以宋閻士良所述黃河利害一帙付參知政事馬琪曰  
此書所言亦有可用者今以賜卿二月上諭平章政事  
守貞曰王汝嘉田櫟專管河防此國家之重事也朕比  
問其曾於南岸行視否乃稱未也又問水決能行南岸  
乎又云不可知且水趨北久矣自去歲便當經畫今不  
稱職如是耶可諭旨令往盡心固護無致失備及講究  
所以經久之計稍涉違慢當併治罪三月行省并行戶

工部及都水監官各言河防利害事都水監元擬於南岸王村宜村兩處開導河勢緣北來水勢去宜村堤稍緩唯王村岸向上數里卧捲可以開決作一河且無所犯之城市村落又擬於北岸牆村疏決依舊分作兩清河入梁山故道北清河兩岸素有小堤不完復當築大堤尚書省謂以黃河之水勢若於牆村決注則山東州縣膏腴之地及諸鹽場必被淪溺設使修築壞堤而又吞納不盡功役至重虛困山東之民非徒無益而又害

之也況長堤已加固護復於南岸疏決水勢已寢決河  
入梁山濼之議水所經城邑已勸率作護城堤矣先所  
修清河舊堤宜遣罷之監丞田櫟言定陶以東三埽棄  
堤不當修止言決舊壓河口以導漸水入堤北張彪白  
塔兩河之間凡當水衝屯田戶湏令遷徙臣等所見止  
當堤前作木岸以備之其間居人未當遷徙至夏秋水  
勢之溢權令避之水落則當各復業此亦戶工部之所  
言也上曰地之相去如此其遠彼中利害安得悉知惟

委行省盡心措畫可也四月以田櫟言河防事上諭旨  
參知政事持國曰此事不惟責卿要卿等同心規畫不  
勞朕心爾如櫟所言築堤用二十萬工歲役五十日五  
年可畢此役之大古所未有況其成否未可知就使可  
成恐難行也遷徙軍戶四千則不為難然其水時決尚  
不知所歸儻有潰走若何枝梧如今南岸兩處疏決使  
其水趨南或可分殺其勢然水之形勢朕不親見難為  
條畫雖卿亦然丞相左丞皆不熟此可集百官詳議以



行百官咸謂櫟所言棄長堤無起新堤放河入梁山故道使南北兩清河分流為省費息民長久之計臣等以為黃河水勢非常變易無定非人力可以斟酌可以指使也況梁山櫟淤填已高而北清河窄狹不能吞伏兼所經州縣農民廬井非一使大河北入清河山東必被其害櫟又言乞許都水監符下州府運司專其用度委其任責一切同於軍期仍委執政提控緣今監官已經添設又於外監署司多以沿河州府長官兼領之及令

佐管勾河防其或怠慢已有同軍期斷罪的決之法凡  
櫟所言無可用遂寢其議八月以河決陽武故堤灌封  
邱而東尚書省奏都水監行部官有失固護詔命同知  
都轉運使高旭武衛軍副都指揮使鈕祜祿奕小字罕嘉努  
同往規措尚書省奏都水監官前來有犯已經戒諭使  
之常切固護今王汝嘉等殊不加意既見水勢趨南不  
預經畫承留守司累報輒為遷延以至害民即是故違  
制旨私罪當的決詔汝嘉等各削官兩階杖七十罷職

上謂宰臣曰李愈論河決事謂宜遣大臣往以慰人心  
其言良是嚮慮河北決措畫堤防猶嘗置行省況今方  
橫潰為害而止差小官恐失衆望自國家觀之雖山東  
之地重於河南然民皆赤子何彼此之間乃命參知政  
事馬琪往仍許便宜從事上曰李愈不得為無罪雖都  
水監官非提刑司統攝若與留守司以便宜率民固護  
或申聞省部亦何不可使朕聞之徒能張皇水勢而無  
經畫及其已決乃與王汝嘉一往視之而還亦未嘗有

所施行問王村河口開導之月則對以四月終其實六月也月日尚不知提刑司官當如是乎尋命戶部員外郎何格振濟被浸之民時行省參知政事胥持國馬琪言已至光祿村周視堤口以其河水浸漫堤岸陷潰至十餘里外乃能取土而堤面窄狹僅可數步人力不可施雖窮力可以暫成終當復毀而中道淤澱地有高低流不得泄且水退新灘亦難開鑿其孟華等四埽與孟陽堤道沿汴河東岸但可施功者即悉力修護將於農

隙興役及凍畢工則京城不至為害參知政事馬琪言  
都水外監員數冗多每事相倚或復邀功議論紛紜不  
一隳廢官事擬罷都水監掾設勾當官二員又自昔選  
用都散巡河官止由監官辟舉皆諸司人或有老疾避  
倉庫之繁行賄請託以致多不稱職擬升都巡河作從  
七品於應入縣令廉舉人內選注外散巡河依舊亦於  
諸司及丞簿廉舉人內選注並取年六十以下有精力  
能幹者到任一年委提刑司體察若不稱職即日罷之

如守禦有方致河水安流任滿從本監及提刑司保申  
量與升除凡河橋司使副亦擬同此選注繼而胥持國  
亦以為言乃從其請閏十月平章政事守貞曰馬琪措  
畫河防事未見功役之數加之積歲興功民力將困今  
持國復病請別遣有材幹者往議之上曰堤防救護若  
能成功則財力固不敢惜第恐財殫力屈成而復毀如  
重困何宰臣對曰如盡力固護縱為害亦輕若恬然不  
顧則為害滋甚上曰無乃因是致盜賊乎守貞曰宋以

河決興役亦嘗致盜賊然多生於凶歉今時平歲豐少  
有差役未必至此且河防之役理所當然今之當役者  
猶為可耳至於科徵薪芻不問有無督輸迫切則破產  
業以易之恐民益困爾上曰役夫湏近地差取若遠調  
之民益艱苦但使津濟可也然當俟馬琪至而後議之  
庚辰琪自行省還入見言孟陽河堤及汴堤已填築補  
修水不能犯汴城自今河勢趨北來歲春首擬於中道  
疏決以解南北兩岸之危凡計工八百七十餘萬可於

正月終興工臣乞前期再往河上監視上以所言付尚書省而治檢覆河堤并守漲官等罪有差他日尚書省奏事上語及河防事馬琪奏言臣非敢不盡心然恐智力有所不及若別差官相度儻有奇畫亦未可知如適與臣策同方來興功亦庶幾稍寬朝廷憂顧上然之命翰林待制鄂也忠孝權尚書戶部侍郎太府少監溫防權尚書工部侍郎行戶工部事修治河防且諭之曰汝二人皆朕皆素識以故委任冀副朕意如有錯失亦不



汝容承安元年七月勅自今沿河傍側州府縣官雖部  
除者皆勿令員闕泰和二年九月勅御史臺官河防利  
害初不與卿等事然臺官無所不問應體究者亦體究  
之五年二月以崔守真言黃河危急芻藁物料雖云折  
稅每年不下五六次或名為和買而未嘗還其直勅委  
右三部司正郭澥御史中丞孟鑄講究以聞澥等言大  
名府鄭州等處自承安二年以來所科芻藁未給價者  
計錢二十一萬九千餘貫遂命以各處見錢差能幹官

同各州縣清強官一一酬之續令按察司體究宣宗貞祐三年壬申上遣參知政事侯摯祭河神於宜村三年四月單州刺史延扎天澤言守禦之道當決大河使北流德博觀滄之境今其故堤宛然猶在工役不勞水就下必無漂沒之患而難者若不以犯滄鹽場損國利為說必以浸沒河北良田為解臣嘗聞河側故老言水勢散漫則淺不可以馬涉深不可以舟濟此守禦之大計也若曰浸民田則河徙之後淤為沃壤正宜耕墾收倍

于常利孰大焉若失此計則河南一路兵食不足而河北山東之民皆瓦解矣詔命議之四年三月延州刺史溫薩克蘇言近世河離故道自衛東南而流由徐邳入海以此河南之地為狹臣竊見新鄉縣西河水可決使東北其南有舊堤水不能溢行五十餘里與清河合則由濬州大名觀州清州柳口入海此河之故道也皆有舊堤補其缺罅足矣如此則山東大名等路皆在河南而河北諸郡亦得其半退足以為禦備之計進足以壯

恢復之基又言南岸居民既已籍其河夫修築河堰營作戍屋又使轉輸芻糧賦役繁般倍於他所夏秋租稅猶所未論乞減其稍緩者以寬民力事下尚書省宰臣謂河流東南舊矣一旦決之恐故道不容衍溢而出分為數河不復可收水分則淺狹易渡天寒輒凍禦備愈難此甚不可詔但令量宜減南岸郡縣居民之賦役五年夏四月勅樞密院沿河要害之地可壘石岸仍置撒星橋隔馬塹以備敵

漕渠金都於燕東去潞水五十里故為牐以節高良河  
白蓮潭諸水以通山東河北之粟凡諸路瀕河之城則  
置倉以貯傍郡之稅若恩州之臨清歷亭景州之將陵  
東光清州之興濟會川獻州及深州之武強是六州諸  
縣皆置倉之地也其通漕之水舊黃河行滑州大名恩  
州景州滄州會川之境漳水東北為御河則通蘇門獲  
嘉新鄉衛州濬州黎陽衛縣彰德磁州洺州之餽衡水  
則經深州會于滹沱以來獻州清州之餉皆合于信安

海壖沂流而至通州由通州入肺十餘日而後至於京師其他若霸州之巨馬河雄州之沙河山東之北清河皆其灌輸之路也然自通州而上地峻而水不留其勢易淺舟膠不行故常從事陸輓人頗艱之世宗之世言者請開盧溝金口以通漕運役衆數年竟無成功事見盧溝其後亦以肺河或通或塞而但以車輓矣其制春運以冰消行暑雨畢秋運以八月行冰凝畢其綱將發也乃合衆以所載之粟苴而封之先以付所卸之地視

與所封樣同則受凡綱船以前期三日修治日裝一綱  
裝畢以三日啟行計道里分沂流沿流為限至所受之  
倉以三日卸又三日給收付凡輓漕脚直水運鹽每石  
百里四十八文米五十文一分二釐七毫粟四十文一  
分三毫錢則每貫一文七分二釐八毫陸運傭直米每  
石百里百一十二文一分五毫粟五十七文六分八釐  
四毫錢每貫三文九釐六毫餘物每百斤行百里平路  
則春冬百三十一文五分夏秋百五十七文八分山路

則春冬百四十九文夏秋二百一文凡使司院務納課  
傭直春冬九十文三分夏秋百一十四文諸民戶射賃  
官船漕運者其脚直以十分為率初年尅二分二年尅  
一分八釐三年尅一分七釐四年尅一分五釐五年以  
上尅一分初世宗大定四年八月以山東大熟詔移其  
粟以實京師十月上出近郊見運河湮塞召問其故主  
者云戶部不為經畫所致上召戶部侍郎曹望之責曰  
有河不加濬使百姓陸運勞甚罪在汝等朕不欲即加



罪宜悉力使漕渠通也五年正月尚書省奏可調夫數萬上曰方春不可勞民令官籍監戶東宮親王人從及五百里內軍夫濬治二十一年八月以京城儲積不廣詔沿河恩獻等六州粟百萬餘石運至通州輦入京師明昌三年四月尚書省奏遼東北京路米粟素饒宜航海以達山東昨以按視東京近海之地自大務清口并咸平銅善館皆可置倉貯粟以通漕運若山東河北荒歉即可運以相濟制可承安五年邊河倉州縣可令折

納菽二十萬石漕以入京驗品級養馬於俸內帶支仍  
漕麥十萬石各支本色乃命都水監丞田櫟相視運糧  
河道泰和元年尚書省以景州漕運司所管六河倉歲  
稅不下六萬餘石其科州縣近者不下二百里官吏取  
賄延阻人不勝苦雖近官監之亦然遂命監察御史一  
員往來糾察之五年上至霸州以故漕河淺澁勅尚書  
省發山東河北河東中都北京軍夫六千改鑿之犯屯  
田戶地者官對給之民田則多酬其價六年尚書省以

凡漕河所經之地州縣官以為無與於己多致淺滯使  
綱戶以盤淺剝載為名姦弊百出於是遂定制凡漕河  
所經之地州府官銜內皆帶提控漕河事縣官則帶管  
勾漕河事俾催檢綱運營護堤岸為府三大興大名彰  
德州十二恩景滄清獻深衛濬滑磁洺通縣三十三大  
名元城館陶夏津武城歷亭臨清吳橋將陵東光南皮  
清池靖海興濟會川交河樂壽武強安陽湯陰臨漳成  
安滏陽內黃黎陽衛蘇門獲嘉新鄉汲潞武清香河滌

陰十二月通濟河叛設巡河官一員與天津河同為一  
司通管漕河腴岸上名天津河巡河官隸都水監八年  
六月通州刺史張行信言船自通州入腴凡十餘日方  
至京師而官支五日轉脚之費遂增給之貞祐三年既  
遷于汴以陳潁二州瀕水欲借民船以漕不便遂依觀  
州漕運司設提舉官募船戶而籍之命戶部勾當官往  
來巡督四年從右丞侯摯言開沁水以便餽運上又念  
京師轉輸之勞命出尚廩牛及官車以助其力興定四

年十月諭皇太子曰中京運糧護送官當擇其人萬有一失樞密官亦有罪矣其船當用摩和納所造兩首尾者仍張幟如渡軍之狀勿令敵知為糧也陝西行省巴古喇言陝西歲運糧以助關東民力浸困若以舟自渭入河順流而下可以紓民力遂命嚴其偵候如有警則皆維於南岸時朝廷以邳徐宿泗軍儲京東縣輓運者歲十餘萬石民甚苦之元光元年遂於歸德府置通濟倉設都監一員以受東郡之粟定國節度使李復亨言

河南駐蹕兵不可闕糧不厭多比年少有匱乏即仰給  
陝西陝西地腴歲豐十萬石之助不難但以軍運之費  
先去其半民何以堪宜造大船二十由大慶關度入河  
東抵湖城往還不過數日篙工不過百人使舟皆容三  
百五十斛則是百人以數日運七千斛矣自夏抵秋可  
漕三千餘萬斛且無稽滯之患上從之時又於靈璧縣  
潼郡鎮設倉都監及監支納以方開長直溝特由萬安  
湖舟運入汴至泗以貯粟也

盧溝河大定十年議決盧溝以通京師漕運上忻然曰  
如此則諸路之物可徑達京師利孰大焉命計之當役  
千里內民夫上命免被災之地以百官從人助役已而  
勅宰臣曰山東歲饑工役興則妨農作能無怨乎開河  
本欲利民而反取怨不可其姑罷之十一年十二月省  
臣奏復開之自金口疏導至京城北入壕而東至通州  
之北入潞水計工可八十日十二年三月上令人覆按  
還奏止可五十日上召宰臣責曰所餘三十日徒妨農

費工卿等何為慮不及此及渠成以地勢高峻水性渾濁峻則奔流漩洄齧岸善崩濁則泥淖淤塞積滓成淺不能勝舟其後上謂宰臣曰分廬溝為漕渠竟未見功若果能行南路諸貨皆至京師而價賤矣平章政事駙馬元忠曰請求識河道者按視其地竟不能行而罷二十五年五月廬溝決於上陽村先是決顯通寨詔發中都三百里內民夫塞之至是復決朝廷恐枉費工物遂令且勿治二十七年三月宰臣以孟家山金口隄下視



都城高一百四十餘尺止以射糧軍守之恐不足恃儻  
遇暴漲人或為姦其害非細若固塞之則所灌稻田俱  
為陸地種植禾麥亦非曠土不然則更立重障仍於岸  
上置埽官廨署及埽兵之室庶幾可以無虞也上是其  
言遣使塞之夏四月丙子詔封盧溝水神為安平侯二  
十八年五月詔盧溝河使旅往來之津要令建石橋未  
行而世宗崩章宗大定二十九年六月復以涉者病河  
流湍急詔命造舟既而更命建石橋明昌三年三月成

勅命名曰廣利有司謂車駕之所經行使客商旅之要  
路請官建東西廊令人居之上曰何必然民間自應為  
爾左丞守貞言但恐為豪右所占況固利之人多止東  
岸若官築則東西兩岸俱稱亦便於觀望也遂從之六  
月盧溝隄決詔速遏塞之無令泛溢為害右拾遺路鐸  
上疏言當從水勢分流以行不必補修元同口以下丁  
村以上舊堤上命宰臣議之遂命工部尚書胥持國及  
路鐸同檢視其隄道

滹沱河大定八年六月滹沱犯真定命發河北西路及河間太原冀州民夫三萬八千繕完其隄岸十年二月滹沱河叔設巡河官二員十七年滹沱決白馬崗有司以聞詔遣使固塞發真定五百里內民夫以十八年二月一日興役命同知真定尹呼沙呼同知河北西路轉運使徐偉監護

漳河大定二十年春正月詔有司修護漳河肺所須工物一切並從官給毋令擾民明昌六年六月漳河及盧

溝河隄決詔命速塞之四年春正月癸未有司言修漳  
河隄埽計三十八萬餘工詔依盧溝河例招被水闕食  
人充夫官支錢米不足則調礙水人戶依上支給

金史卷二十七

欽定四庫全書

金史卷二十八

元中書右丞相總裁托克托等修

志第九

禮一 郊

金人之入汴也時宋承平日久典章禮樂粲然備具金人既悉收其圖籍載其車輅法物儀仗而北時方事軍旅未遑講也既而即會寧建宗社庶事草創皇統間熙

宗巡幸析津始乘金輅導儀衛陳鼓吹其觀聽赫然一新而宗社朝會之禮亦次第舉行矣繼以海陵狼顧志欲併吞江南乃命官修汴故宮繕宗廟社稷悉載宋故禮器以還外而黷武內而縱欲其猷既失奚敢議禮樂哉世宗既興復收嚮所遷宋故禮器以旋迺命官參校唐宋故典沿革開詳定所以議禮設詳校所以審樂統以宰相通學術者於一事之宜適一物之節文既上聞而始彙次至明昌初書成凡四百餘卷名曰金纂修雜

錄凡事物名數支分派引珠貫綦布井然有序炳然如  
丹又圖吉凶二儀因簿十三節以備大葬小園簿九節  
以備郊廟而命尚書左右司春官兵曹太常寺各掌一  
本其意至深遠也是時寓內阜安民物小康而維持幾  
百年者實此乎基嗚呼禮之為國也信矣夫而況闕睢  
麟趾之化其流風遺思被於後世者為何如也宣宗南  
播彊宇日蹙地日方升而燭火之燃蔡流弗東而餘燼  
滅矣國籍散逸既莫可尋而其宰相韓企先等之所論



列禮官張瑋與其子行簡所私著自公紀亦亡其傳故  
書之存僅集禮若干卷其藏史館者又殘缺弗完姑撮  
其郊社宗廟諸神祀朝覲會同等儀而為書若夫凶禮  
則略焉蓋自熙宗海陵衛紹王之繼弑雖曰鹵簿十三  
節以備大葬其行乎否耶蓋莫得而考也故宣孝之喪  
禮雖存亦不復紀噫告朔餼羊雖孔子所不去而史之  
缺文則亦慎之作禮志

南北郊金之郊祀本於其俗有拜天之禮其後太宗即

位乃告祀天地蓋設位而祭也天德以後始有南北郊之制大定明昌其禮寢備南郊壇在豐宜門外當闕之巳地圓壇三成成十二陛各按辰位壇牆三匝四面各三門齋宮東北厠庫在南壇壇皆以赤土圻之北郊方丘在通玄門外當闕之亥地方壇三成成為子午卯酉四正陞方壇三周四面亦三門朝日壇曰大明在飛仁門外之東南當闕之卯地門壇之制皆同方丘夕月壇曰夜明在彰義門外之西北當闕酉地掘地汙之為壇

其中常以冬至日合祀昊天上帝皇地祇於圜丘夏至日祭皇地祇於方丘春分朝日於東郊秋分夕月於西郊大定十一年始郊命宰臣議配饗之禮左丞石琚奏曰按禮記萬物本乎天人本乎祖此所以祖配上帝也蓋配之者侑神作主也自外至者無主不止故推祖考配天尊之也兩漢魏晉以來皆配以一祖至唐高宗始以高祖太宗宗配垂拱初又加以高宗遂有三祖同配之禮至宋亦嘗以三帝配後禮院上議以為對越天地

神無二主由是止以太祖配臣謂冬至親郊宜從古禮  
上曰唐宋以私親不合古不足為法今止當以太祖配  
又謂宰臣曰本國拜天之禮甚重今汝等言依古制築  
壇亦宜我國家絀遼宋主据天下之正郊祀之禮豈可  
不行乃以八月詔曰國莫大于祀祀莫大于天振古所  
行舊章咸在仰惟太祖之基命詒我本朝之燕謀奄有  
萬邦于今五紀因時制作雖增飾于國容推本奉承猶  
未遑于郊見況天休滋至而年穀屢豐最不繹敷曠文

明昭太報取陽升之至日將親饗于園壇嘉與臣工共  
圖熙事以今年十一月十七日有事于南郊畝爾有司  
各揚乃職相予肆祀罔或不歆乃於前一日遍見祖宗  
告以郊祀之事其日備法駕鹵簿躬詣郊壇行禮儀  
注齋戒用唐制大祀散齋四日致齋三日中祀散齋二  
日致齋一日天子親祀皆前期七日攝太尉誓亞終獻  
官親王陪祀皇族於宮省皇族十五以上官雖不至七  
品者亦助祭受誓又誓百官於尚書省攝太尉南向司

徒北向監祭御史在西監禮博士居東皆相向太常卿  
在司徒後重行北向司天監光祿丞太廟令丞大樂令  
丞太官令丞良醢令廩犧令郊社丞司尊太祝奉禮郎  
協律郎諸執事官皆重行西上北向禮直官以誓文授  
攝太尉乃誓曰維某年歲次某甲某月某日某甲皇帝  
有事於南郊各揚其職其或不恭國有常刑禮直官贊  
曰七品以下官皆退餘皆再拜退誓於宮省之儀皆同  
於是皇帝散齋于別殿前致齋一日尚舍設御坐於大

安殿當中南向設東西房於御坐之側設御幄於室內  
施簾於楹下享前三日陳設小次享前一日設拜褥及  
皇帝版位皇帝飲福位及黃道氈褥自玉輅下至升輿  
所及致齋之日通事舍人引文武五品以上官陪位如  
式諸侍衛之官各服其器服並結珮俱詣閣奉迎上丑  
二刻侍中板奏外辦皇帝服袞冕結珮乘輿出警蹕侍  
衛如常儀皇帝即御坐東向坐通事舍人承傳殿上下  
俱拜訖西面贊各祇候一刻頃侍中跪奏臣某言請降

就齊俛伏興還侍位皇帝降座入室羣官皆退諸執事  
官皆宿於正寢治事如故不弔喪問疾不判署刑殺文  
字不決罰罪人不與穢惡事致齊日惟祀事則行餘悉  
禁已齊而闕者通攝行事 陳設前祀五日儀鸞尚舍  
陳設齋宮有司設扈從侍衛次於宮東西又設陪祀親  
王次宮東稍南西向北上宗室子孫位於其後又設司  
徒亞終獻行事執事官次於壇南外壝門之東西向北  
上重行異位又設天名房在壇南外壝門之東西向大



禮使次於其後皆西向又設席大屋於壇外西北駐車輅以備風雪祀前三日尚舍設大次於東壇外門內道北南向又設小次於壇下卯陛之北南向有司設饌幔於東壇中門之北南向設兵衛各服其器服守衛壇門每門二人郊社令帥其屬埽除壇之上下及壇之内外乃為燎位在南中壇東門之東壇之已位又為瘞坎在中壇內戊位祀前二日大樂令帥其屬設登歌之樂於壇上稍南北向王磬在午陛之西金鐘在午陛之東柷

一在鐘前稍北敔一在磬前稍北東西相向歌工之次  
餘工各立於縣後琴瑟在前匏竹在後於壇下第一等  
上皆重行異位北向又設宮縣樂南壝外門之外八脩  
二舞表於樂前又設采茨樂於應天門前祀前一日奉  
禮郎升設皇帝版位於壇上辰巳之間北向又設皇帝  
飲福位於其左稍却北向又帥禮直官設亞終獻位於  
卯陞之東北西向北上司徒位於卯陞之東道南西向  
禮部尚書太常卿光祿卿禮部侍郎位各次之太常丞

光祿丞又次之又設大禮使位於小次之左少却西向  
又設分獻官司天監讀冊中書侍郎位於中壝門道北  
西向郊社令廩犧令太官令良醢令位於其後又設郊  
社丞大祝奉禮郎以下諸執事官於其後皆西向重行  
異位又設從祀文武羣官一品至五品位於中壝門內  
道南西向皆重行立又設助奠祝史齋郎位於東壝門  
外道北西向又設陪祀皇族於道南西向六品至九品  
從祀羣官又於其南皆西向重行異位各依其品又設

監祭御史二員一員在午陛之西南一員在子陛之西北皆東向又設監禮博士二員一員在午陛之東南一員在子陛之東北皆西向又設大樂令位於樂簾之間稍東西向協律郎位於樂簾之西東向又設奉禮郎於壇南稍東西向贊者次之司尊位於酌尊所俱北向又設牲勝於外壝東門之外西向饌勝於其北稍西南向牲勝之東牲位太史太祝各位於牲後俱西向又設禮部尚書太常卿光祿卿位於牲勝南稍北西向太常丞

光祿丞太官令位於其後監祭御史監禮博士於禮部  
尚書位之西稍却北向廩犧令位在牲位西南北向又  
陳禮饌於饌牐之前案上未後三刻陳饌之時又設禮  
部尚書太常卿光祿卿位於案前稍東北上西向太常  
丞光祿丞大官令位於其後西向又設監祭御史監禮  
博士位於案前稍西北上東向又設異寶嘉瑞位於宮  
縣西北太府少監位於寶後諸州歲貢位於宮縣東北  
戶部郎中位於其後天子八寶位於宮縣西南符寶郎

八員各於寶後伐國毀寶位於宮縣東南少府少監位  
於其後又設大樂令位於宮縣之北稍東協律郎二在  
大樂令南東西相向司天監未後二刻同郊社令升設  
昊天上帝皇地祇神座於壇上北方南向地祇位在東  
稍却席皆以藁秸太祖配位座於東方西向席以蒲越  
五方帝日月神州地祇天皇大帝北極神座於壇上第  
一等席皆藁秸內官五十四座五神五官獄鎮海瀆二  
十九座於壇第二等中官一百五十八座崑崙山林川

澤二十一座於壇上第三等外官一百六十座邱陵墳  
衍原隰三十座於內壝之內衆星三百六十座在內壝  
之外席皆以莞神座版各設於座首又設禮神玉俟告  
潔畢權徹去壇上及第一等神位祀日前五刻重設奉  
禮郎同司尊及執事者設天地配位各左十有一籩右  
十有一豆俱為三行登三在籩豆間籩一簋一於登前  
籩在左簋在右各於神座前藉以席又設天地位太尊  
各二著尊各二犧尊各二山罍各二壇上東南隅配位

著尊二犧尊二象尊二在天地位酒尊之東俱北向西  
上皆有站加勺罍為酌尊所又天地位象尊各二壺尊  
各二山罍各四在壇下午陛之南北向西上配位壺尊  
二山罍四在西陛之北東向北上皆有站設而不酌亦  
左以明水右以玄酒又設五方帝日月神州地祇天皇  
大帝北極第一等皆左八簋右八豆登在簋豆間簋一  
簋一在登前爵站一在神座前第一等內官五十四座  
五神五官嶽鎮海瀆二十九座每座簋二豆二簋一簋



一俎一爵站一第二等中官一百五十八座崑崙山林  
川澤二十一座及內壝內外官一百六十座邱陵墳衍  
原隰三十座內壝外衆星三百六十座每位籩二豆二  
簋一簋一俎一爵一又設第一等每位太尊二著尊二  
皆有站加勺第二等每位山尊二第三等每位厘尊二  
內壝內外每辰祭尊二皆加勺自第二等已下皆用匏  
爵先洗拭訖置於尊所其尊所皆在神位之左凡祭器  
皆藉以席籩豆各加巾蓋又設天地及配位籩一豆一

簋一簋一俎四及毛血豆各一并第一等神位每位俎  
二在饌幔內又設皇帝洗位於卯陛下道北南向盥洗  
在東爵洗在西匱在東巾在西簠南肆寶玉爵站又設  
亞終獻洗位在小次之東南向盥洗在東爵洗在西加  
勺簠在西南肆加巾又設第一等分獻官盥洗爵洗位  
及第二等分獻官盥洗位各於其長陞道之左壘在洗  
左簠在洗右俱內向執壘簠者位於其後太府監少府  
監祀前一日未後二刻帥其屬升壇陳玉幣昊天上帝

以蒼璧蒼幣皇地祇以黃琮黃幣配位以蒼幣黃帝以黃琮青帝以青珪赤帝以赤璋大明以青珪璧白帝以白琥黑帝以玄璜北極以青珪璧天皇大帝以玄珪璧神州地祇以玄色兩珪有邸皆置於匣五帝之幣各從其方色凡幣皆陳於篚設訖俟告潔訖權徹去祀日重設祀日且前五刻禮部設祝冊神座之右皆藉以案太常卿明燈燎戶部郎中設諸州歲貢於宮縣東北金為前列玉帛次之餘為從列皆籍以席立於歲貢之後北

向太府監少府監設異寶嘉瑞於宮縣西北上瑞居前  
中下次之皆藉以席立於寶後北向少府少監設伐國  
毀寶於宮縣東南皆藉以席立於寶後北向符寶即設  
八寶於宮縣西南各分立於寶南皆北向司天監太府  
監少府監郊社令奉禮郎升設昊天上帝皇地祇配位  
及壇上第一等神座又設玉幣各於其位太祝取瘞玉  
加於幣以禮神之玉各置於神座前乃退光祿卿帥其  
屬入寶祭器昊天上帝皇地祇配位每位籩三行以右

為上形鹽在前魚鱸鯉次之第二行榛實在前乾桃  
乾榛乾棗次之第三行乾菱在前乾芡乾栗鹿脯次之  
豆三行以左為上芹蒹在前筍蒹葵蒹次之第二行薤  
蒹在前菁蒹魚醢兔醢次之第三行豚胎在前醢醢醢  
食鹿鶩次之簋黍簋稷登皆大羹第一等壇上一十位  
每位皆實籩三行以右為上形鹽在前魚鱸次之第二  
行乾榛在前桃棗次之第三行乾芡在前榛實鹿脯次  
之豆三行以左為上芹蒹在前筍蒹葵蒹次之第二行薤

在前薤菹魚醢次之第三行豚胎在前醢醢次之鹿羈  
次之簠黍簋稷登大羹第二第三等每位邊二鹿脯乾  
棗豆二鹿羈菁菹俎羊一段內壝內內壝外每位邊鹿  
脯豆鹿羈俎羊一段良醢令卽其屬入實尊罍昊天  
帝皇地祇大尊為上實以汎齊著尊次之實以醴齊犧  
尊次之實以盎齊象尊次之實以醢齊壺尊次之實以  
汎齊山罍為下實以三酒配位著尊為上實以汎齊犧  
尊次之實以醴齊象尊次之實以盎齊壺尊次之實以

醞齊山尊爲下實以三酒第一等每位大尊實以汎齊  
著尊實以醴齊第二等山尊實以醞齊第三等及內壝  
內蜃尊實以汎齊內壝外及衆星槩尊實以三酒 省  
牲器祀前一日午後八刻去壇二百步禁止行人未後  
二刻郊社令丞帥其屬掃除壇之上下司尊奉禮郎帥  
執事者以祭器入設於位司天監設神位太府監少府  
監陳玉幣於簏未後三刻禮直官引廩犧令與諸太祝  
祝史以牲就位又禮直官贊者分引禮部尚書太常卿

光祿卿禮部侍郎太常丞監祭御史監禮博士廩犧令  
太官令太官丞詣內壝東門外省牲位立定乃引禮部  
尚書侍郎太常丞及監祭御史監禮博士升自卯階視  
濯滌執事者皆舉暴告潔俱畢降復位禮直官稍前曰  
告潔畢請省牲禮部尚書侍郎及太常卿丞稍前省牲  
訖退復位次引光祿卿丞巡牲一匝光祿卿退光祿丞  
西向折身曰備訖乃復位次引廩犧令巡牲一匝西向  
躬身曰充又引諸祝史巡牲一匝首一員西向躬身曰



脯畢俱復位禮直官稍前曰請省饌乃引禮部尚書以下各就位立定省饌訖禮直官引禮部尚書侍郎太常卿丞各還齋所餘官廩犧令與諸太祝祝史以次牽牲詣厨投太官令丞次引光祿卿丞監祭監禮詣厨省鼎鑊視滌濯畢乃還齋所脯後一刻太官令帥宰人以鸞刀割牲祝史各取毛血實以豆置於饌幔遂烹牲祝史乃取瘞血貯於盤奠玉幣祀日丑前五刻亞終獻司徒以下應行事陪從羣官各服其服就次司天監復設

壇上及第一等神位太府監少府監陳玉幣太常卿和  
社令丞明燭燎光祿卿丞實籩豆簠簋尊壺侯監祭監  
禮案視訖徹去巾蓋大樂令帥工人布於宮縣之內文  
舞八佾立於縣前表後武舞八佾各為四佾立於宮縣  
左右引舞執纛等在前又引登歌樂工由卯陛而升各  
就其位歌擊彈者坐吹者立奉禮郎贊者先入就位餘  
禮直官贊者分引分獻官監祭御史監禮博士諸執事  
及太祝祝史齋郎助奠執尊壺舉冪等官入自中壝東

門當壇南重行西上北向立定奉禮郎贊拜分獻官以下皆再拜訖奉禮贊曰各就位贊者禮直官分引監祭御史監禮博士按視壇之上下糾察不如儀者退復位禮直官引司徒入就位西向立禮直官引博士博士引亞獻自東壝偏門入就位西向立又禮直官引終獻次於其位祀日未明一刻通事舍人引侍中詣齋殿跪奏請中嚴俛伏興又少頃乃跪奏外辦候尚輦進輿乃跪奏稱具官臣某請皇帝降座升輿皇帝至大次乃跪奏

稱具官臣某請皇帝降輿皇帝入次即位於大次外質  
明詣次前跪奏請中嚴少頃又奏外辦訖太常卿乃當  
次前跪稱具官臣某請皇帝行事俛伏興凡跪奏准此  
皇帝出次乃前導至中壝門殿中監進大圭太常卿奏  
請執大圭入自正門皇帝入小次位西向立太常卿乃  
與博士分左右立定乃奏有司謹具請行事降神六成  
樂止太常卿別一員乃升烟瘞血訖乃奏拜拜訖侍中  
升壇請詣盥洗位至位奏請搢大圭盥手訖奏請悅手

皇帝悅手訖奏請執大圭乃引至壇上殿中監進鎮圭  
乃奏請搢大圭執鎮圭皇帝執鎮圭詣昊天上帝神座  
前奏請跪奠鎮圭皇帝奠訖執大圭俛伏興侍中進玉  
幣乃奏請搢大圭跪奠玉幣訖乃奏請執大圭俛伏興  
少退又奏請再拜詣皇地祇及配位奠鎮圭玉幣並如  
上儀配位唯奏請奠鎮圭及幣奠玉幣畢皇帝還版位  
乃奏請還小次釋大圭皇帝入小次乃立於小次之南  
稍東以俟皇帝將奠配位之幣也贊者分引第一等分

獻官詣盥洗位搯笏盥手悅手執笏各由其陞升唯不  
由午陞詣神前搯笏跪太祝以玉幣授之奠訖俛伏興  
再拜訖各由本陞降復位初獻將降也禮直官引諸  
祝史齋郎應助奠者再拜祝史各奉毛血之豆入各由  
其陞升諸太祝迎取於壇上奠訖退立於尊所進熟  
奠玉幣訖降還小次有司先陳牛鼎三羊鼎三豕鼎三  
魚鼎三各在鑊右太官令丞帥進饌者詣廚以七升牛  
羊豕魚自鑊各實於鼎牛羊豕皆肩臂臠脰正脊各

一長脇二短脇二代脇一凡十一體牛豕皆三十斤羊  
十五斤魚十五頭一十五斤實訖畢之祝史二人以肩  
對舉一鼎牛鼎在前羊豕次之魚又次之有司執鼎以  
從各陳於每位饌幔位從祀壇上第一等五方帝大明  
夜明天皇大帝神州地祇北極皆羊豕之體並同光祿  
卿帥祝史齋郎太官令丞各以匕升牛羊豕魚於俎肩  
臂臠在上端肫胙在下端七脇在中魚即橫置頭在尊  
位設去鼎畢光祿卿丞同太官令丞實籩豆簠簋籩實

以粉養豆實以糝食簠實稻簋實粱俟皇帝還小次樂止禮直官引司徒出詣饌幔所與薦籩豆簠簋俎齋郎各奉天地配位之饌司徒帥太官令以序入內壝正門樂作至壇下俟祝史進徹毛血豆降自卯陞以次出訖司徒與薦籩豆簠簋俎齋郎奉昊天上帝皇地祇之饌自升午陞太官令丞與薦籩豆簠簋俎齋郎奉配位及第一等神位之饌升自卯陞各位太祝迎於壇陞之道間於昊天上帝位司徒搢笏北向跪奉粉養籩在糝餌



之前糝食豆在醢醢之前簠左簋右皆在登前牛俎在  
豆前羊豕魚俎次之以右為上司徒俛伏興奉饌者奉  
訖皆出笏就位一拜司徒次詣皇地祇奉奠並如上儀  
配位亦同司徒及奉天地配位饌者以次降太官令帥  
奉第一等神位之饌各於其位並如前儀俱畢樂止司  
徒太官令以下皆就位訖侍中升自卯陞立於昊天  
上帝酌尊所以俟太常卿乃當次前俛伏跪奏請皇帝詣  
盥洗位俛伏興皇帝出次殿中監進大圭乃奏請執大

主至盥洗位奏請搢大圭盥手皇帝盥手訖奏請帨手  
皇帝帨手訖奏請執大圭乃詣爵洗位至位奏請搢大  
圭受爵又奏請洗爵皇帝洗爵訖奏請拭爵皇帝拭爵  
訖奏請執大圭以爵授奉爵官皇帝詣昊天上帝酌尊  
所執爵良醑令舉畢侍中跪酌太尊之汎齊酌訖皇帝  
以爵授侍中皇帝乃詣昊天上帝神座前侍中進爵乃  
奏請搢大圭跪執爵三祭酒訖奏請奠爵奠爵訖奏請  
執大圭俛伏興又奏請少退立俟中書侍郎讀冊文訖

乃奏請再拜詣皇地祇位及配位並如上儀獻畢皇帝還版位乃奏請還小次釋大圭皇帝入小次太常卿立於小次東南禮直官引博士博士引亞獻詣盥洗位措笏盥手帨手訖詣爵洗位措笏洗爵拭爵訖以爵授執事者執笏升自卯陞詣昊天上帝酌尊所西向立執事者以爵授之乃措笏執爵執尊者舉罍良醢令跪酌著尊之醴齊酌訖復以爵授執事者執笏詣昊天上帝神座前初亞獻至盥洗位文舞退武舞進樂作亞獻詣昊

天上帝神座前措笏跪執事者以爵授之乃執爵三祭  
酒奠爵執笏俛伏興少退再拜次詣皇地祇及配位並  
如上儀獻畢降復位禮直官引博士博士引終獻詣盥  
洗位盥手洗爵升壇奠獻並如上儀初終獻將升壇禮  
直官分引第一等分獻官詣盥洗位措笏盥手帨手執  
笏各由其陞唯不由午陞詣神位酌尊所執事者以爵  
授之乃酌汎齊訖以爵授執事者共詣神座前措笏跪  
執事者以爵授之乃執爵三祭酒奠爵執笏俛伏興少

退再拜訖各引還本位初第一等分獻官將升贊引引  
第二等第三等內壇內外衆星位分獻各詣盥洗位搯  
笏盥手帨手酌酒奠拜並同上儀祝史齋郎以次助奠  
訖各還本位諸太祝各進徹籩豆各一少移故處樂作  
卒徹樂止初終獻禮畢降復位太常卿乃當次前俛伏  
跪奏請皇帝詣飲福位皇帝出次殿中監進大圭乃奏  
請執爵三祭酒又奏請啐酒皇帝啐酒訖以爵授侍中  
乃奏請受胙侍中再以爵酒進乃奏請受爵飲福皇帝

飲福訖奏請執大圭俛伏興又奏請再拜訖乃導還版位西向立俟送神樂止乃奏請詣望燎位至位南向立俟火半柴乃跪奏具官臣某言禮畢皇帝還大次出中壘門外奏請釋大圭皇帝入大次初終獻禮畢司徒侍中大祝各升自卯陞太祝持胙俎進減天地配位前胙肉加於俎皆取前腳第二節入以黍稷飯共置一邊奉詣司徒侍中後北向立俟皇帝至飲福位太常卿奏請皇帝搢大圭啐酒訖司徒乃進胙俎皇帝受胙訖奉禮

卽贊曰賜胙贊者唱曰再拜在位者皆再拜送神樂一成止皇帝旣入大次更通天冠絳紗袍升輿至齋宮乘金輅通事舍人引門下侍郎當輅前跪奏稱具官臣某請車駕進發至侍臣上馬所乃跪奏具官臣某請車駕少駐勅侍臣上馬侍中稱制可乃退傳制稱侍臣上馬侍臣上馬畢乃跪奏稱具官臣某請勅車右升千牛將軍升訖跪奏稱具官臣某請車駕進發車駕動前中後三部鼓吹凡十二隊齊作應行禮陪從祀官先詣應天

門奉迎再拜大樂令先詣應天門外準備奏樂如儀訖  
擇日稱賀

承安元年將郊禮官言禮神之玉當用真玉燔玉當用  
次玉昔大定十一年天地之玉皆以次玉代之臣等疑  
其未盡禮貴有恒不能繼者不敢以獻若燔真玉常祀  
用之恐有時或闕反失禮制若從近代之典及本朝儀  
禮真玉禮神次玉燔瘞於禮為當近代郊自第二等升  
天皇大帝北極於第一等前八位舊各有禮玉燔玉而



此二位尚無之按周禮典瑞云以圭璧祀日月星辰近代禮九宮貴神大火星位猶用周禮之說其天皇大帝北極二位固宜用禮神之玉及燔玉也上命俱用真玉省臣又奏前時郊天地配位各用一獮五方帝日月神州天皇大帝北極十位皆大祀亦當用獮當時止以羊代第二等以下從祀神位則分封羊豕以獻竊意天地之祀饗豆尚多者以備陰陽之物鼎俎尚少者以人之烹薦無可以稱其德則貴質而已故天地日月星辰之

位皆用一俎前時第一等神位徧用二俎似為不倫今  
第一等神位亦當各用犢一餘位以羊豕分獻及朝享  
太廟則用犢十二上從之



金史卷二十八

# 欽定四庫全書

史部

金史卷

二十九至  
三十一

詳校官國子監祭酒臣覺羅官喜

內閣中書臣李彤覆勘

總校官舉人臣章維桓

校對官學錄目常 楠

謄錄監生目張彭齡

欽定四庫全書

金史卷十九

元中書右丞相

陸

禮

二方正儀朝中勿月

裁托克托等修

方正儀成祭前三日廣明看司設三獻以下行事官  
位於尚書省初獻南面監祭御史位於西東向監禮博  
上位於東面俱北坐司徒亞終獻位於南北向次光

祿卿太常卿次第一等分獻官司天監次第二等分獻  
官光祿丞郊社令大樂令良醞令康犧令司尊彝次內  
壝內外分獻官太祝官奉禮郎協律郎諸執事官就位  
立定次禮直官引初獻就位初獻讀誓曰今年五月幾  
日夏至祭皇地祇於方丘所有攝官各揚其職其或不  
敬國有常刑讀畢禮直官贊七品以下官先退餘官對  
拜訖退散齋二日宿於正寢治事如故齋禁並如郊祀  
守壝門兵衛與大樂工人俱清齋一宿行禮官前期習

儀於祠所 陳設祭前三日所司設三獻官以下行事  
執事官次於外壝東門之外道南向西上隨地之宜  
又設饌幕於內壝東門之外道北南向祭前二日所司  
設兵衛各服其服守衛壝門每門二人大樂令帥其屬  
設登歌之樂於壇上如郊祀郊社令帥其屬掃除壇之  
上下為壅坎在內壝外之壬地祭前一日司天監郊社  
令各服其服帥其屬升設皇地祇神座於壇上北方南  
向席以藁秸又設配位神座於東方西向席以蒲越又

設神州地祇神座於壇之第一等東南方席以藁秸又設五神五官獄鎮海瀆二十九座於第四等階之間各依方位又設崑崙山林川澤二十一座於內壝之內又設邱陵墳衍原隰三十座於內壝外席皆以莞又設神位版各於座首子陞之西水神玄冥北嶽北鎮北海北瀆於壇之第二等北山北林北川北澤於內壝內北邱北陵北墳北衍北原北隰於內壝外皆各為一列以東為上卯陞之北木神勾芒東嶽長白山東鎮東海東瀆



於壇之第二等東山東林東川東澤於內壝內東邱東陵東壝東衍東原東隰於內壝外皆各為一列以南為上午陞之東神州地祇於壇之第一等火神祝融南嶽南鎮南海南瀆於壇之第二等南山南林南川南澤於內壝內南邱南陵南壝南衍南原南隰於內壝外皆各為一列以西為上午陞之西土神后土中嶽中鎮於壇之第二等中山中林中川中澤於內壝內中邱中陵中壝中衍中原中隰於內壝外皆各為一列以南為上西

陛之南金神蓐收西嶽西鎮西海西瀆於壇之第二等  
崑崙西山西林西川西澤於內壇內西邱西陵西墳西  
衍西原西隰於內壇外皆各為一列以北為上其皇地  
祇及配位神州地祇之座并禮神之玉設訖俟告潔畢  
權徹祭日早重設其第二等以下神座設定不收奉禮  
卽禮直官又設三獻官位於卯陛之東稍北西向司徒  
位於卯陛之東道南西向太常卿光祿卿次之第一等  
分獻官司天監位於其東光祿丞郊社令太官令廩犧

令位又在其東每等異位重行俱西向北上又設太祝奉禮卽及諸執事位於內壝東門外道南每等異位重行俱西向北上設監祭御史位二一於壇下午陞之西南一於子陞之西北俱東向設監禮博士位二一於壇下午陞之東南一於子陞之東北俱西向奉禮卽位於壇之東南西向協律卽位於樂簾西北東向大樂令位於樂簾之間西向司尊彝位於酌尊所俱北向設望瘞位坎之南北向又設牲牷位於內壝東門之外西向太

祝祝史各位於牲後俱西向設省饌位於牲西太常卿  
光祿卿太官令位於牲北南向西上監祭監禮位在太  
常卿之西稍却西上廩犧令位於牲西南北向又陳禮  
饌於內墻東門之外道北南向設省饌位於禮饌之南  
太常卿光祿卿太官令位在東西向監祭監禮位在西  
東向俱北上設祝版於神位之右司尊及奉禮郎帥其  
屬設玉幣筐於酌尊所次及籩豆之位正配位各左有  
十一籩右有十一豆俱為三行登三在籩豆間鉶三在

登前簋一盞一各在鉶前又設尊罍之位皇地祇太尊  
二著尊二犧尊二山罍二在壇上東南隅配位著尊二  
犧尊二象尊二山罍二在正位酒尊之東俱北向西上  
皆有站加勺幕為酌尊所又設皇地祇位象尊二壺尊  
二山罍四在壇下午陛之西配位犧尊二壺尊二山罍  
四在酉陛之北東向北上皆有站加幕設而不酌神州  
地祇位左八簋右八豆登一在籩豆間簋一盞一在登  
前爵站一在神座前又設第二等諸神位每位籩二豆

二簋一簋一俎一爵坫一內壝之內外諸神每位遵一  
豆一簋一簋一俎一爵坫一陳列皆與上同又設神州  
地祇太尊二著尊二皆有坫第二等諸神每方山尊二  
內壝內每方屬尊二內壝外每方概尊二皆加勺罍又  
設正配位遵一豆一簋一簋一俎三及毛血豆一并神  
州地祇位俎一各於饌罍內又設二洗於壇下卯陞之  
東北向盥洗在東爵洗在西並有罍加勺篚在洗西南  
肆實以巾爵洗之篚實以匏爵加坫又設第一分獻官

盥洗爵洗位第二等以下分獻官盥洗位各於其方道之左罍在洗左篚在洗右俱內向執爵篚者各於其後祭日丑前五刻司天監郊社令帥其屬升設皇地祇及配位神座於壇上設神州地祇座於第一等又設玉幣皇地祇玉以黃琮神州地祇玉以兩圭有邸皆置於匣正配位幣並以黃色神州地祇幣以玄色五神五官嶽鎮海瀆之幣各從其方色皆陳於篚太祝取瘞玉加於幣以禮神之玉各置於神座前光祿卿帥其屬入實正

配位遵豆遵三行以右為上豆三行以左為上其實並如郊祀登實以大羹銅實以和羹又設從祭第一等神州地祇之饌遵三行以右為上豆三行以左為上其實並如郊祀登實以大羹簋實以稷簋實以黍第二等每位左二遵栗在前鹿脯次之右二豆菁菹在前鹿鸞次之簋實以稷簋實以黍俎一羊一豕內壻內外每位左遵一鹿脯右豆一鹿鸞簋稷黍俎以羊良醢令臠其屬入實酒尊皇地祇太尊為上實以汎齊著尊次之實



以醴齊犧尊次之實以盎齊象尊次之實以醍齊壺尊  
次之實以沉齊山罍為下實以三酒配位著尊為上實  
以汎齊犧尊次之實以醴齊象尊次之實以盎齊壺尊  
次之實以醍齊山罍為下實以三酒皆左實明水右實  
玄酒皆尚醴代次實從祭第一等神州地祇酒尊太尊  
為上實以汎齊著尊次之實以醴齊第二等山尊實以  
醴齊內壺內蜎尊實以汎齊內壺外概尊實以三酒以  
上尊皆左以明水右以玄酒皆尚醴代之太常卿設燭

於神座前 省牲罷祭前一日午後八刻去壇二百步  
禁止行者未後二刻郊社令帥其屬掃除壇之上下司  
尊與奉禮郎帥執事者以祭器入設於位郊社令陳玉  
幣於篚未後三刻廩犧令與諸太祝祝史以牲就省位  
禮直官贊者分引太常卿光祿卿丞監禮祭太官令等  
詣內壇東門外省牲位其視滌濯告潔省牲饌並同郊  
祀俱畢廩犧令諸太祝祝史以次牽牲詣厨授太官令  
次引光祿卿以下詣厨省鼎鑊視滌漑乃還齋所脯後

一刻太官令帥宰人以鶩刀割牲祝史各取毛血實以豆置於饌慢遂烹牲又祝史取瘞血貯於盤奠玉幣

祭日丑前五刻獻官以下行事官各服其服有司設神位版陳玉幣實籩豆簋簠尊壺俟監祭監禮按視壇之上下乃徹去蓋暴大樂令帥工人及奉禮郎贊者先入禮直官贊者分引分獻官以下監祭監禮諸太祝祝史齋郎與執事者入自南嚮東門當壇南重行北向西上立定奉禮郎贊拜獻官以下皆再拜訖以次分引各就

壇陞上下位次引監祭監禮按視壇之上下訖退復位  
禮直官分引三獻官以下行事官俱入就位行禮官皆  
自南遣東門入禮直官進立初獻之左白曰有司謹具  
請行事退復位協律郎高舉笏執麾者舉麾俛伏興工  
鼓祝樂作坤寧之曲八成偃麾戛鼓樂止俟太常卿瘞  
血訖奉禮郎贊拜在位者皆再拜又贊諸執事者各就  
位禮直官引諸執事各就其位俟太祝跪取玉幣於簠  
立於尊所諸位太祝亦各取玉幣立於尊所禮直官引

初獻詣盥洗位樂作肅寧之曲至位北向立樂止搢笏  
盥手悅手執笏詣壇樂作肅寧之曲凡初獻升降皆作  
肅寧之曲升自卯階至壇樂止詣皇地祇神座前北向  
立樂作靜寧之曲搢笏跪太祝加玉於幣西向跪以授  
初獻初獻受玉幣奠訖執笏悅伏興再拜訖樂止次詣  
配位神座前東向立樂作億寧之曲奠幣如上儀樂止  
降自卯陛樂作復位樂止初獻將奠配位之幣贊者引  
第一等分獻官詣盥洗位搢笏盥手悅手執笏由卯陛

詣神州地祇神座前搢笏跪太祝以玉幣授分獻官分獻官受玉幣奠訖執笏俛伏興再拜訖退初第一分獻官將升贊者引第二分獻官詣盥洗位盥手悅手執笏各由其陞升唯不由午陞詣於首位神座奠幣如上儀餘以次祝史齋郎助奠訖各引還位初獻奠幣將畢祝史奉毛血豆各由午陞升諸太祝迎於壇上進奠於正配位神座前太祝與祝史俱退立於奠所進熟初獻既升奠玉幣有司先陳牛鼎二羊鼎二豕鼎二於神厨

各在鑊右太官帥進饌者詣厨以七升牛羊豕自鑊實  
於各鼎牛羊豕各肩臂臠肫脰正脊一橫脊一長脇一  
短脇一代脇一背二骨一並羣之祝史以肩各對舉鼎  
有司執匕以從陳於饌幔內從祀之俎實以羊更陳於  
饌幔內光祿卿實以蓮豆簋簋蓮實以粉餐豆實以糝  
食簋實以稷簋實以黍實訖去鼎之肩羣匕加於鼎太  
官令以七升牛羊豕載於俎肩臂臠在上端肫脰在下  
端脊脇在中俟初獻還位樂止禮直官引司徒出詣饌

所同薦籩豆簠簋俎齊郎各奉皇地祇配位之饌升自  
卯陞諸太祝各迎於壇上司徒詣皇地祇神座前搢笏  
奉籩豆簠簋次奉俎北向跪奠訖執笏俛伏興設籩於  
糗餌之前豆於醢醢之前簠簋在登前俎在籩前次於  
卯陞奉配位之饌東向跪奠於神座前並如上儀各降  
自卯陞還位太官令又同齊郎奉神州地祇之饌升自  
卯陞太祝迎於壇陞之道間奠於神座前左籩前訖樂  
止太官令進饌者降自卯陞還位禮直官引初獻官詣



盥洗位樂作至位樂止北向立搢笏盥手執笏詣

爵洗位至位北向立搢笏洗爵拭爵以授執事者執笏

詣壇樂作升自卯陛至壇上樂止詣皇地祇酌尊所西

向立執事者以爵授初獻初獻搢笏執爵司尊舉罍良

醞令跪酌太尊之汎齊酌訖初獻以爵授執事者執笏

詣皇地祇神座前北向立搢笏跪執事者以爵授初獻

初獻執爵三祭酒於茅苴奠爵

三獻奠爵皆執事者受以興

執笏俛

伏興少退跪樂止舉祝官跪對舉祝版讀祝太祝東向

跪讀祝訖俛伏興舉祝奠版於案再拜興次詣配位酌  
尊所執事者以爵授初獻搢笏執爵司尊舉羣良醞令  
跪酌著尊之汎齊樂作太簇宮保寧之曲初獻以爵授  
執事者執笏詣配位神座前東向立搢笏跪執事者以  
爵授初獻初獻執爵三奠酒於茅苴奠爵執笏俛伏興  
少退跪樂止讀祝訖樂作就拜位拜興降自卯陞讀祝  
舉祝俱從樂作復位樂止次引亞獻詣盥洗位北向立  
搢笏盥手悅手執笏詣爵洗位北向立搢笏洗爵拭爵

授執事者執笏升自卯陞詣皇地祇酌尊所西向立執事者以爵授亞獻亞獻搢笏執爵司尊舉鬯良醞令酌著尊之醴齊酌訖以爵授執事者執笏詣皇地祇神座前北向立搢笏跪執事以爵授亞獻亞獻執爵三祭酒於茅苴奠爵執笏俛伏興少退再拜次詣配位酌獻如上儀唯酌犧尊為異樂止降復位次引終獻詣盥洗位盥手悅手洗爵拭爵以爵授執事者升壇正位酌犧尊之盎齊配位酌象尊之醴齊尊獻並如亞獻之儀禮畢

降復位初終獻將升贊者引第一等分獻官詣盥洗位  
搯笏盥手帨手洗爵拭爵以爵授執事者執笏詣神  
地祇酌尊所搯笏執事者以爵授獻官獻官執爵執事  
者酌太尊之汎齊酌訖以爵授執事者進詣神座前搯  
笏跪執事者以爵授獻官獻官執爵三祭酒於茅苴奠  
爵俛伏興少退跪再拜訖還位初第一等分獻官將升  
贊者分引第二等分獻官詣盥洗位搯笏盥手帨手執  
笏詣酌尊所執事以爵授分獻官分獻酌以授執事者

進詣首位神座前奠獻並如上儀祝史齋卽以次助奠  
訖各引還位諸獻俱畢諸太祝進徹籩豆籩豆各一少  
移故處樂作豐寧之曲卒徹樂止奉禮官贊曰賜胙衆  
官再拜樂作一成止初送神樂止引初獻官詣望瘞位  
樂作太簇宮肅寧之曲至位南向立樂止初在位官將  
拜諸太祝祝史各奉篚進取神座前玉幣從祭神州地  
祗以下並以俎載牲體并取黍稷飯爵酒各由其陞降  
壇北詣瘞坎實於坎中又以從祭之位禮幣皆從瘞禮

直官曰可瘞東西六行寘土半坎禮直官贊禮畢引初獻出禮官贊者各引祭官及監祭監禮太祝以下俱復壇南北向立定奉禮郎贊曰再拜監祭以下皆再拜訖奉禮以下及工人以次出先祿卿以胙奉進監祭監禮展視其祝版燔於齋坊

朝日夕月儀齋戒陳設省牲器奠玉幣進熟其節並如大祀之儀朝日玉用青璧夕月用白璧幣皆如玉之色牲各用羊一豕一有司攝三獻司徒行事其親行朝日

金初用本國禮天會四年正月始朝日于乾元殿而後  
受賀天眷二年定朔望朝日儀皇帝服靴袍百官常服  
有司設爐案御褥位于所御殿前陞上設百官褥位于  
殿門外皆向日宣徽使奏導皇帝至位南向再拜上香  
又再拜各門皆相應贊殿門外臣僚陪拜如常儀大定  
二年以無典故罷十五年言事者謂今正旦并萬春節  
宜令有司定拜日之禮有司援據漢唐春分朝日升煙  
奠玉如圜丘之儀又按唐開元禮南向設大明神位天

子北向皆無南向拜日之制今已奉敕以月朔拜日宜  
遵古制殿前東向拜詔姑從南向其日先引臣僚於殿  
門外立陪位立殿前班露臺左右皇帝於露臺香案拜  
如上儀十八年上拜日於仁政殿始行東向之禮皇帝  
出殿東向設位宣徽贊拜皇帝再拜上香訖又再拜臣  
僚並陪拜依班次起居如常儀

高禔明昌六年章宗未有子尚書省臣奏行高禔之祀  
乃築壇于景風門外東南端當闕之卯辰地與園丘東



西相望壇如北郊之制歲以春分日記青帝伏羲氏女  
媧氏凡三位壇上南向西上姜嫄簡狄位於壇之第二  
層東向北上前一日未三刻布神位省牲器陳御弓矢  
弓韣於上下神位之右其齋戒奠玉幣進熟皆如大祀  
儀青帝幣玉皆用青餘皆無玉每位牲用羊一豕一有  
司攝三獻司徒行事禮畢進胙倍於他祀之內進胙官  
佩弓矢弓韣以進上命后妃嬪御皆執弓矢東向而射  
廼命以次飲福享胙

金史卷二十九

欽定四庫全書

金史卷三十

元中書右丞相總裁托克托等修

志第十一

禮三

宗廟  
朝享

禘祫  
時享儀

金初無宗廟天輔七年九月太祖葬上京宮室之西南  
建寧神殿于陵上以時薦享自是諸京皆立廟惟在京  
師者則曰太廟天會六年以宋二帝見太祖廟者是也

或因遼之故廟安置御容亦謂之廟天眷三年熙宗幸燕及受尊號皆親享恭謝是也皇統三年初立太廟八年太廟成則上京之廟也貞元初海陵遷燕乃增廣舊廟奉遷祖宗神主于新都三年十一月丁卯奉安于太廟正隆中營建南京宮室復立宗廟南渡因之其廟制史不載傳志雜記或可概見今附之汴京之廟在宮南馳道之東殿規一屋四間限其北為神室其前為通廊東西二十六楹為間二十有五每間為一室廟端各虛

一間為夾室中二十三間為十一室從西三間為一室

為始祖廟祔德帝安帝獻祖昭祖景祖祧主五餘皆兩

間為一室

或曰惟第二第三室兩間餘止一間為一室總十有七間

世祖室祔肅宗

穆宗室祔康宗餘皆無祔每室門一牖一門在左牖在

右皆南向石室之龕於各室之西壁東向其世祖之龕

六南向者五東向者一其二其三俱二龕餘皆一室一

龕總十八龕祭日出主於北牖下南向禘祫則並出主

始祖東向群主依昭穆南北相向東西序列室戶外之

通廊殿階二級列陛三前井亭二外作重垣四繚南東西皆有門內垣之隅有樓南門五閭餘皆三中垣之外東北冊寶殿也太常官一人季視其封緘謂之點寶內垣之南曰大次東南為神庖廟門翼兩廡各二十有五楹為齋郎執事之次西南垣外則廟署也神門列戟各二十有四植以木鐫戟下以板為掌形畫二青龍下垂五色帶長五尺享前一日則縣戟上祭畢藏之室次大定十二年議建閤宗別廟禮官援晉惠懷唐中宗後

唐莊宗升祔故事若依此典武靈皇帝無嗣亦合升祔然中宗之祔始則為虛室終則增至九室惠懷之祔乃遷豫章潁川二廟莊宗之祔乃祔懿祖一室今太廟之制除祧廟外為七世十一室如當升祔武靈即須別祧一廟荀子曰有天下者事七世若旁容兄弟上毀祖考則天子有不得事七世者矣伏觀宗廟世次自睿宗上至始祖凡七世別無可祧之廟晉史云廟以容主為限無拘常數東晉與唐皆用此制遂增至十一室康帝承

統以兄弟為一室故不遷遠廟而祔成帝唐以敬文武  
三宗同為一代於太廟東間增置兩室定為九代十一  
室今太廟已滿此數如用不拘常數之說增至十二室  
可也然廟制已定復議增展其事甚重又與睿宗皇帝  
祔室昭穆亦恐更改春秋之義不以親親害尊尊漢志  
云父子不並坐而孫可從王父若武靈升祔太廟增作  
十二室依春秋尊尊之典武靈當在十一室禘祫合食  
依孫從王父之典當在太宗之下而居昭位又當稱宗



然前升祔睿宗已在第十一室累遇裕享睿宗在穆位  
與太宗昭位相對若更改祔室及昭穆序非有司所敢  
輕議宜取聖裁十九年四月禘祔閏宗遂增展太廟為  
十二室二十九年世宗將祔廟有司言太廟十二室自  
始祖至熙宗雖係八世然世宗與熙宗為兄弟不相為  
後用晉成帝故事止係七世若特升世宗顯宗即係九  
世於是五月遂祔獻祖昭祖升祔世宗明德皇后顯宗  
于廟貞祐二年宣宗南遷廟社諸祀並委中都自穆延

盡忠棄城南奔時謂之禮盡廢四年禮官言廟社國之大事今主上駐蹕陪京列聖神主已遷于此宜重修太廟社稷以奉歲時之祭按中都廟制自始祖至章宗凡十二室而今廟室止十一若增建恐難卒成況時方多故禮宜從變今擬權祔肅宗主世祖室始祖以下諸神主于隨室奉安主用栗依唐制皇統九年所定也祔室旁及上下皆石門東向以木為闔縣以朱室中有褥英主訖帝主居左覆以黃羅帕后主居右覆以紅羅帕

蒲展以紙木為筐兩足如立屏牀覆以紅羅三幅繡金  
斧五十四裏以紅絹覆於屏上其半無文者垂於其後  
置北牖下南向前設几筵以坐神主 五席各長五尺  
五寸濶二尺五寸莞筵粉純以蘭為席緣以紅羅以白  
繡蕙文及雲氣之狀復以紅絹裹之每位二繅席畫純  
以五色絨織青蒲為之緣以紅羅畫藻文及雲氣狀亦  
以紅絹裹之每位二在莞上次席散純以輕筠為之亦  
曰桃枝席緣以紅絹繡鐵色斧裏以紅絹每位二在繅

席上虎席二大者長同惟濶增一尺以虎皮為褥在緼  
以紅羅繡金色斧緣之又有小虎皮褥制同三席時暄  
則用桃枝次席時寒則去桃枝加虎皮褥夏秋享則用  
桃枝次席二冬則去桃枝加小虎皮褥於繅席上臘冬  
則又添大虎皮褥二於繅上遷小虎皮褥二在大褥之  
上曲几三足直几二足各長尺五寸以丹漆之 帝主  
前設曲几后設直几

禘祫大定十一年尚書省奏禘祫之儀曰禮緯三年一

禘五年一禘唐開元中太常議禘禘之禮皆為殷祭禘謂合食祖廟禘謂禘序尊卑中先君逮下之慈成群嗣奉親之孝自異常享有時行之祭不欲數數則黷不欲踈踈則怠是以王者法諸天道以制祀典烝嘗象時禘禘象閏五歲再閏天道大成宗廟法之再為殷祭自周以後並用此禮自大定九年已行禘禮若議禘祭當於禘後十八月孟夏行禮詔以三年冬禘五年夏禘為常禮又言海陵時每歲止以二月十月遣使兩享三年禘

享按唐禮四時各以孟月享于太廟季冬又臘享歲凡  
五享若依海陵時歲止兩享非天子之禮宜從典禮歲  
五享從之享日並出神主前廊序列昭穆應圖功臣配  
享廟廷各配所事之廟以位次為序以太子為亞獻親  
王為終獻咸並用親王或以太尉為亞獻光祿卿為終  
獻其月則停時享儀闕

朝享儀大定十一年十一月郊祀前一日朝享太廟齊  
戒如親郊享前三日太廟令帥其屬掃除廟之內外點

檢司於廟之前約度設兵衛旗幟尚舍於南神門之西  
設饌慢十一南向以西為上殿中監帥尚舍陳設大次  
殿又設小次於阼階下稍南西向又設皇帝拜褥位殿  
上版位稍西又設黃道褥於廟門之內外自玉輅至升  
輦之所又自大次至東神門又設七祀位一於殿下橫  
街之北西街之西東向配享功臣位於殿下道東橫街  
之南西向北上前二日大樂令設宮縣之樂於庭中四  
方各設編鐘三編磬三東方編鐘起北編磬間之東向

西方編磬起北編鐘間之西向南方編磬起西編鐘間之北方編鐘起西編磬間之俱北向設特磬大鐘鐃鐘共十二於編縣之內各依神位樹路鼓路鼓於北縣之內道之左右晉鼓一在其後稍南植建鼓鞀鼓應鼓於四隅建鼓在中鞀鼓在左應鼓在右置祝敔於縣內祝一在道東敔一在道西立舞表於鄮綴之間設登歌之樂於殿上前楹間金鐘一在東玉磬一在西俱北向祝一在金鐘北稍西敔一在玉磬北稍東搏拊二一在祝



北一在殿北東西相向琴瑟在前其匏竹者立於階間  
重行北向諸工人各位於縣後前一日太廟令開室奉  
禮郎帥其屬設神位於每室內北牖下各設黼宸一筭  
席一繅席二次席二紫綾厚褥一紫綾蒙褥一曲几一  
直几一又設皇帝版位於殿東間門內西向又設飲福  
位於東序西向又設亞終獻位於殿下橫街之北稍重  
西向助祭親王宗室使相位在亞終獻之後助祭宗室  
位在橫街之南西向奉瓚官奉瓚盤官進爵酒官奉爵

官等又在其南奉匱幣中筐官位於其後七祀獻官位在奉爵官之南助奠讀祝奉壘洗爵洗等官位於其後司尊彝官位在七祀獻官之南亞終獻司壘洗爵洗奉爵酒官等又在其南並西向北上大禮使位於西階之西稍南與亞終獻相對大尉司徒助祭宰相位在大禮使之南侍中執政官又在其南禮部尚書太常卿太僕卿光祿卿功臣獻官在西舉冊光祿丞太常博士又在其西功臣助奠壘洗爵洗等官位於功臣獻官之後又

設監祭御史位二於西階下俱東向北上奉禮郎太廟  
令太官令太祝宮闈令祝史位於亞獻終獻奉爵酒官  
之南薦籩豆簋簋官薦俎齊郎又在太祝奉禮郎之南  
太廟丞太官丞各位於今後協律郎位二一於殿上前  
楹間一於宮縣之西北俱東向大樂令於登歌樂縣之  
北大司樂於宮縣之北良醞令於酌尊所俱北向又設  
助祭文武群官位於橫街之南東向北上又設光祿卿  
陳牲位於東神門外橫街之東西向以南為上設廩犧

令位於牲西南北向諸太祝位於牲東各當牲後祝史各陪其後俱西向設禮部尚書省牲位於牲前稍北又設御史位於禮部尚書之西俱南向禮部帥其屬設祝冊案於室戶外之右司尊彝帥其屬設彝尊之位於室尸之左每位尊彝一黃彝一犧尊二象尊二著尊二山罍二各加勺簠站為酌尊又設瓚槃爵站於篚置于始祖尊彝所又設壺尊二太尊二山罍四各有站簠在殿下階間北向西上設而不酌七配功臣每位設壺尊二

於座之左皆加簠站於內酌尊加勺皆藉以席奉禮郎  
設祭器每位四簋在前四簠次之次以六觶次以六鉶  
籩豆為後左十有二籩右十有二豆皆濯而陳之藉以  
席籩豆加以巾蓋於內籩一豆一簋一簠一并俎四設  
於每室饌幔內又設御洗二於東階之東又設亞終獻  
壘洗於東橫街下東南北向壘在洗東篚在洗西南肆  
實以巾又設亞終獻爵洗於壘洗之西壘在洗東篚在  
洗西南肆實以巾爵并站執巾壘巾篚各位於其後享

日丑前五刻太常卿帥執事者設燭於神位前及戶外  
光祿卿帥其屬入實籩豆籩之實魚鱠糗餌粉養乾棗  
形鹽鹿脯榛實乾榛桃菱芡栗以序為次豆之實芹菹  
笋菹葵菹菁菹韭菹醢食魚醢兔醢豚胎鹿醢醢糝  
食以序為次又鉶實以羹加芼滑登實以大羹簋實以  
稻粱簋實以黍稷粱在稻前稷在黍前良醢令入實尊  
彝尊彝黃彝實以鬱鬯犧尊象尊著尊實以玄酒外皆  
實以酒用香藥酒各加坩勺簾殿下之尊罍壺尊太尊山壘

內除山罍太尊實以玄酒外皆實以酒加罍玷太廟令  
帥其屬設七祀功臣席褥於其次每位各設莞席一碧  
綃褥一又各設版位於其座前又邊豆簋簠各二俎一  
每位次各設壺尊二於神座之右北向玄酒在西良醢  
令以法酒實尊如常加勺罍置爵於尊下加玷光祿卿  
實饌左二邊栗在前鹿脯次之右二豆菁菹在前鹿韞  
次之俎實以羊熟簋簠實以黍稷太廟令又設七祀燎  
柴又開瘞坎於西神門外之北太府監陳異寶嘉瑞伐

國之寶戶部陳諸州歲貢金為前列玉帛次之餘為後  
皆於宮縣之北東西相向各藉以席凡祀神之物當時  
所無者則以時物代之 省牲器前一日未後廟所禁  
行人司尊彝奉禮郎及執事者升自西階以俟少頃諸  
太祝與廩犧令以牲就位禮直官贊者引禮部尚書光  
祿卿丞詣省牲位立定禮直官引禮部尚書贊引者引  
御史入就西階升遍視滌濯訖執事者皆舉簾曰潔俱  
降就省牲位禮直官稍前曰告潔畢請省牲次引禮部



尚書侍郎稍前省牲訖退復位次引光祿卿丞出班巡  
牲一匝光祿丞西向曰克曰備廩犧令帥諸太祝巡牲  
一匝西向躬身曰膳禮直官稍前曰省牲畢請就省饌  
位引禮部尚書以下各就位立定御史省饌具畢禮直  
官贊省饌訖俱還齋所光祿卿丞及太祝廩犧令以次  
牽牲詣厨授太官令禮直官引禮部尚書詣厨省鼎鑊  
視濯漑訖還齋所脯後一刻太官令帥宰人執鷹刀割  
牲祝史各取毛血每座共實一豆遂烹牲祝史洗肝於

鬱鬯又取肝腎每座共實一豆俱還饌所 鑾駕出宮  
前一日有司設大駕鹵簿於應天門外尚輦進玉輅於  
應天門內南向其日質明侍臣直衛及導駕官於致齋  
殿前左右分班立俟通事舍人引侍中俛伏跪奏請中  
嚴皇帝服通天冠絳紗袍少頃侍中奏外辦皇帝出齋  
室即御座群官起居訖尚輦進輿侍中奏請皇帝升輿  
皇帝乘輿侍衛警蹕如常儀太僕卿先詣玉輅所攝衣  
而升正立執轡導駕官前導皇帝至應天門內玉輅所

侍中進當輿前奏請皇帝降輿升輅皇帝升輅太僕卿  
立授綏導駕官分左右步導以裏為上門下侍郎進當  
輅前奏請車駕進發奏訖俛伏興退復位侍衛儀物止  
於應天門內車駕動稱警蹕至應天門門下侍郎奏請  
車駕少駐勅侍臣上馬侍中奉旨退稱曰制可門下侍  
郎退轉制稱侍臣上馬贊者承傳勅侍臣上馬導駕官  
分左右前導門下侍郎奏請車駕進發車駕動稱警蹕  
不鳴鼓吹將至太廟禮直官贊者各引享官通事舍人

分引從享群官宗室子孫於廟門外立班奉迎駕至廟門迴輅南向侍中於輅前奏稱侍中臣某言請皇帝降輅步入廟門皇帝降輅導駕官前導皇帝步入廟門稍東侍中奏請皇帝升輿尚輦奉輿侍衛如常儀皇帝乘輿至大次侍中奏請皇帝降輿入就大次皇帝入就次簾降繖扇侍衛如常儀太常卿太常博士各分立於大次左右導駕官詣廟庭班位立俟晨裸享日丑前五刻諸享官及助祭官各服其服太廟令良醞令帥其屬

入實尊靈光祿卿大官令進饌者實籩豆簠簋並徹去  
蓋罍奉禮郎贊者先入就位贊者引御史太廟令太祝  
宮闈令祝史與執事官等各自東偏門入就位未明二  
刻禮直官引太常寺官屬并太祝宮闈令升殿開始祖  
祫室太祝宮闈令捧出帝后神主設於座以次逐室神  
主各設於內黼宸前置定贊者引御史太廟令宮闈令  
太祝祝史與太常官屬於當階間重行北向立奉禮郎  
於殿上贊奉神主訖奉禮曰再拜贊者承傳御史以下

皆再拜訖各就位大樂令帥工人二舞入就位禮直官贊者各引享官通事舍人分引助祭文武群官宗室入就位符寶郎奉寶陳於宮縣之北皇帝入大次少頃侍中奏請中嚴皇帝服袞冕侍中奏外辦太常卿俛伏跪奏稱太常卿臣某言請皇帝行事俛伏興簾捲皇帝出次太常卿太常博士前導繖扇侍衛如常儀大禮使後從至東神門外殿中監跪進鎮圭太常卿奏請執圭皇帝執鎮圭繖扇仗衛停於門外近侍者從入協律郎跪

伏舉麾興工鼓祝宮縣昌寧之樂作至阼階下偃麾憂  
敬樂止升自阼階登歌樂作左右侍從量人數升至版  
位西向立樂止前導官分左右侍立太常卿前奏請再  
拜皇帝再拜奉禮曰衆官再拜贊者承傳凡在位者皆  
再拜奉禮又贊諸執事者各就位禮直官贊者分引執  
事者各就殿上下之位太常卿奏請皇帝詣壘洗位登  
歌樂作至阼階樂止降自阼階宮縣樂作至洗位樂止  
內侍跪取匱興沃水又內侍跪取盤興承水太常卿奏

請搢鎮圭皇帝搢鎮圭盥手訖內侍跪取巾於篚興以進  
悅手訖奉瓚盤官以瓚跪進皇帝受瓚內侍奉匱沃  
水又內侍跪奉槃承水洗瓚訖內侍跪奉巾以進皇帝  
拭瓚訖內侍奠槃匱又奠巾於篚奉瓚槃官以槃受瓚  
太常卿奉請執鎮圭前導皇帝升殿宮縣樂作至阼階  
下樂止皇帝升自阼階登歌樂作太常卿前導詣始祖  
位酌尊所樂止奉瓚槃官以瓚涖匱執尊者舉簾侍中  
跪酌鬱鬯訖太常卿前導入詣始祖室神位前北向立



太常卿奏請搢鎮圭跪奉瓚槃官西向跪以瓚授奉瓚  
官奉瓚西向以瓚跪進太常卿奏請執瓚以鬯裸地皇  
帝執瓚以鬯裸地訖以瓚授奉瓚槃官太常卿奏請執  
鎮圭俛伏興前導出戶外太常卿奏請再拜皇帝再拜  
太常卿前導詣次位並如上儀裸畢太常卿奏請還版  
位登歌樂作至版位西向立樂止太常卿奏請還小次  
前導皇帝行登歌樂作降自阼階登歌樂止宮縣樂作  
將至小次太常卿奏請釋鎮圭殿中監跪受鎮圭皇帝

入小次簾降樂止少頃宮縣奏來寧之曲以黃鐘為宮  
大呂為角太簇為徵應鐘為羽作仁豐道洽之舞九成  
止黃鐘三奏大呂太簇應鐘各再奏送神通用來寧之  
曲初晨裸將畢祝史各奉毛血及肝膋之豆先於南神  
門外齋郎奉爐炭蕭蒿黍稷各立於肝膋之後皇帝既  
晨裸畢至樂作六成皆入自正門升自太階諸太祝於  
階上各迎毛血肝膋進奠於神座前祝史立於尊所齋  
郎奉爐置於室戶外之左其蕭蒿黍稷各置於爐炭下

齋郎降自西階諸太祝各取肝燔於爐還尊所進熟  
皇帝升裸太官令帥進饌者奉陳於南神門外諸饌慢  
內以西為上禮直官引司徒出詣饌所與薦俎齋郎奉  
俎并薦籩豆簠簋官奉籩豆簠簋禮直官太官令引以  
序入自正門宮縣豐寧之樂作徹豆通曲至太階樂止祝史  
俱進徹毛血之豆降自西階以出饌升諸太祝迎於階  
上各設於神位前先薦牛次薦羊次薦豕及魚禮直官  
引司徒以下降自西階復位諸太祝各取蕭蒿黍稷孺

於脂燎於爐炭訖還尊所贊者引舉冊官升自西階詣  
始祖位之右進取祝冊置於版位之西置訖於祝冊案  
近南立太常卿跪奏請詣壘洗位簾捲出次宮縣樂作  
殿中監跪進鎮圭太常卿奏請執鎮圭前導詣壘洗位  
樂止盥手洗爵並如晨禋之儀盥洗訖太常卿奏請執  
鎮圭前導升殿宮縣樂作至阼階下樂止升自阼階登  
歌樂作太常卿前導詣始祖位尊彝所登歌樂作至尊  
彝所登歌樂止宮縣奏大元之樂文舞進奉爵官以爵

准尊執尊者舉幕侍中跪酌犧尊之泛齊訖太常卿前  
導入詣始祖室神位前北向立太常卿奏請搢鎮圭跪  
奉爵官以爵授進爵酒官進爵酒官西向以爵跪進太  
常卿奏請執爵三祭酒三祭酒於茅苴訖以爵授進爵  
酒官進爵酒官以爵授奉爵官太常卿奏請執鎮圭興  
前導出戶外太常卿奏請少立樂止舉冊官進舉祝冊  
中書侍郎搢笏跪讀祝舉祝官舉冊奠訖先詣次位太  
常卿奏請再拜再拜訖太常卿前導詣次位行禮並如

上儀酌獻畢太常卿前導還版位登歌樂作至位西向  
立定樂止太常卿奏請還小次登歌樂作降自阼階登  
歌樂止宮縣樂作將至小次太常卿奏請釋鎮圭殿中  
監跪受鎮圭入小次簾降樂止文舞退武舞進宮縣奏  
肅寧之樂作功成治定之舞舞者立定樂止 皇帝酌  
獻訖將詣小次禮直官引博士博士引亞獻詣盥洗位  
北向立搢圭盥手帨手執圭詣爵洗位北向立搢圭洗  
爵拭爵以授執事者執圭升自西階詣始祖位尊彝所

西向立宮縣樂作執事者以爵授亞獻亞獻搢圭執爵  
執尊者舉冪太官令酌象尊之醴齊訖詣始祖神位前  
搢圭跪執事者以爵授亞獻亞獻執爵祭酒三祭酒於  
茅苴奠爵執圭俛伏興少退再拜訖博士前導亞獻詣  
次位行禮並如上儀禮畢樂止終獻除本服執笏外餘  
如亞獻之儀七祀功臣獻官行禮畢太常卿跪奏詣飲  
福位簾捲出次宮縣樂作殿中監跪進鎮圭太常卿奏  
請皇帝執鎮圭前導至阼階下樂止升自阼階登歌樂

金定四庫全書  
作將至飲福位樂止初皇帝既獻訖太祝分神位前三  
牲肉各取前脚第二骨加於俎又以籩取黍稷餘共置  
一籩又酌上尊福酒合置一尊又禮直官引司徒升自  
西階東行立於阼階上前楹間北向皇帝既至飲福位  
西向立登歌福寧之樂作太祝酌福酒於爵以奉侍中  
侍中受爵捧以立太常卿奏請皇帝再拜訖奏請搢圭  
跪侍中以爵北向跪以進太常卿奏請執爵三祭酒於  
沙池又奏請啐酒皇帝啐酒訖以爵授侍中太常卿奏



請受胙太祝以黍稷饌籩授司徒司徒跪奉進皇帝受  
以授左右太祝又以胙肉俎跪授司徒司徒受俎訖跪  
進皇帝受以授左右禮直官引司徒退立侍中再以爵  
酒跪進太常卿奏請皇帝受爵飲福飲福訖侍中受虛  
爵以興以授太祝太常卿奏請執圭俛伏興又奏請皇  
帝再拜再拜訖樂止太常卿前導皇帝還版位登歌樂  
作俟至位樂止太祝各進徹籩豆登歌豐寧之樂作卒  
徹樂止奉禮曰賜胙行事助祭官再拜贊者承傳在位

官皆再拜宮縣來寧之樂作一成止太常卿奏禮畢前導降自阼階登歌樂止宮縣樂作出門宮縣樂止繖扇仗衛如常儀太常卿奏請釋鎮圭殿中監跪受鎮圭皇帝還大次通事舍人禮直官贊者各引享官宗室子孫及從享群官以次出及引導駕官東神門外大次前祇候前導如常儀贊者引御史已下俱復執事位立定奏禮曰再拜皆再拜贊者引工人舞人以次出大禮使帥諸禮官太廟令太祝宮闈令升納神主如常儀禮畢禮

直官引大禮使已下降自西階至橫街再拜而退其祝冊藏於櫃七祀功臣分奠如祫享之儀

時享有司行事前期太常寺舉申禮部關學士院司天臺擇日以其日報太常寺前七日受誓戒於尚書省其日質明禮直官設位版於都堂之下依已定誓戒圖禮直官引三獻官并應行事執事官等各就位立定贊揖在位官皆對揖訖禮直官以誓文奉初獻官初獻官揖笏讀誓文某月某日孟春薦享太廟各揚其職不恭其

事國有常刑讀訖執笏七品以下官先退餘官對拜訖乃退散齋四日治事如故宿於正寢唯不弔喪問疾作樂判署刑殺文字決罰罪人及預穢惡致齋三日於本司唯享事得行其餘悉禁一日於享所已齋而闕者通攝行事前三日兵部量設兵衛列於廟之四門前一日禁斷行人儀鸞司設饌慢十一所於南神門外西南向又設七祀司命戶二位於橫街之北道西東向又設群官齋宿次於廟門之東西舍前二日大樂局設登歌之

樂於殿上大廟令帥其屬掃除廟殿門之內外於室內

鋪設神位於北牖下當戶南向設几於筵上又設三獻

官拜褥位二

一在室內  
一在室外

學士院定撰祝文訖計會通進

司請御署降付禮部置於祝案祠祭司濯漑祭器與尊

彝訖鋪設如儀內太尊二山罍二在室犧尊五象尊五

鷄彝一鳥彝一在室戶外之左爐炭稍前著尊二犧尊

二在殿上象尊二壺尊六在下俱北向西上加簠皆設

而不酌并設獻官盥洗位禮部設祝案於室戶外之右

禮直官設位版并省牲位如式前一日諸太祝與廩犧  
令以牲就東神門外司尊彝與禮直官及執事皆入升  
自西階以俟禮直官引太常卿贊者引御史自西階升  
遍視滌濯執尊者舉罌告潔訖引降就省牲位廩犧令  
少前曰請省牲退復位太常卿省牲廩犧令及太祝巡  
牲告備皆如郊社儀既畢太祝與廩犧令以次牽牲詣  
厨授太官令贊者引光祿卿詣厨請省鼎鑊申視滌滌  
贊者引御史詣厨省饌具訖與太常卿等各還齋所太

官令帥宰人以鸞刀割牲祝史各取毛血每室共實一  
豆又取肝腎共實一豆置饌所遂烹牲光祿卿帥其屬  
入實祭器良醢令入實尊彝享日質明百官各服其品  
服禮直官贊者先引御史博士太廟令太官令詣太祝  
祝史司尊彝與執爨籩官等入自南門當階間北面西  
上立定奉禮曰再拜贊者承傳皆再拜訖贊者引太祝  
與宮闈令升自西階詣始祖室開祔室太祝捧出帝主  
宮闈令捧出后主置於座

帝主在西  
后主在東

贊官引太祝與宮

闕令降自西階俱復位奉禮曰再拜贊者承傳在位官  
皆再拜訖俱各就執事位大樂令帥工人入禮直官贊  
者分引三獻官與百官俱自南東偏門入至廟庭橫街  
上三獻官當中北向西上應行事執事官并百官依品  
重行立奉禮曰拜贊者承傳應北向在位官皆再拜

其先

拜者  
不拜

拜訖贊者引三獻官詣廟殿東階下西向立其餘

行事執事官與百官俱各就位訖禮官詣初獻官前稱  
請行事協律郎跪俛伏興樂作禮直官引初獻詣盥洗



位北向立定樂止搢笏盥手帨手執笏詣爵洗位北向立搢笏洗瓚拭瓚以瓚授執事者執笏升殿樂作至始祖室尊彝所西向立樂止執事者以瓚奉初獻官獻官搢笏執瓚執尊者舉簾太官令酌鬱鬯訖初獻以瓚授執事者執笏詣始祖室神位前樂作北向立搢笏跪執事者以瓚授初獻官初獻官執瓚以鬯裸地訖以瓚授執事者執笏俛伏興出戶外北向再拜訖樂止每室行禮並如上儀禮直官引初獻降復位初獻將升裸祝史

各奉毛血肝腎豆及齋郎奉爐炭蕭蒿黍稷簠各於饌  
慢內以俟初獻晨裸訖以次入自正門升自太階諸太  
祝皆迎毛血肝腎豆於階上俱入殿於神座前齋郎官  
奉爐炭蕭蒿簠皆置於室戶外之左與祝史俱降自西  
階以出諸太祝取肝腎洗於鬱鬯燔於爐炭訖還尊所  
享日有司設羊鼎十一豕鼎十一於神厨各在鑊右初  
獻既升裸光祿卿帥齋郎詣厨以七升羊於鑊實於一  
鼎肩膊肱肱肱正脊一橫脊一長脅一短脅一代脅一

皆二骨以並次升豕及羊實於一鼎每室羊豕各一鼎  
皆設扃幕齋郎對舉入鑊於饌幔前齋郎抽扃委于鼎  
右除羃光祿卿帥太官令以七升羊載于一俎肩臂臠  
在上端肫胙在下端脊脅在中次升豕及羊各載于一  
俎每室羊豕各一俎齋郎即以扃舉鼎先退置于神厨  
訖復還饌幔所禮直官引司徒出詣饌幔前立以俟光  
祿卿帥其屬實簋以粉饗實豆以糝食實簋以梁實簋  
以稷俟初獻裸畢復位祝史俱進徹毛血之豆降自西

階以出禮直官引司徒帥薦蓬豆簋簋官奉俎齊郎各奉蓬豆簋簋羊承俎每室以序而進立於南神門之外以俟羊俎在前承俎次之蓬豆簋簋又次之入自正門樂作升自太階諸太祝迎引於階上樂止各設於神位前訖禮直官引司徒以下降自西階樂作復位樂止諸太祝各取蕭蒿黍稷孺於脂燭於爐炭還尊所禮直官引初獻詣罍洗位樂作至位北向立樂止搢笏盥手帨手執笏詣爵洗位北向立搢笏洗爵拭爵以爵授執事

者執笏升殿樂作詣始祖室酌尊所西向立樂止執事者以爵授初獻初獻搢笏執爵執事者舉罇太官令酌犧尊之泛齊訖次詣第二室酌尊所如上儀詣始祖神位前樂作北向立搢笏跪執事者以爵授初獻初獻執爵三祭酒於茅苴奠爵執笏俛伏興出室戶外北向立樂止贊者引太祝詣室戶外東向搢笏跪讀祝祝文讀訖執笏興次詣第二室次詣每室行禮並如上儀初獻降階樂作復位樂止禮直官次引亞獻詣盥洗位北向

立搢笏盥手帨手執笏詣爵洗位北向立搢笏洗爵拭  
爵以授執事官執笏升殿詣始祖酌尊所西向立執事  
者以爵授亞獻亞獻搢笏執爵尊者舉冪太官令酌  
象尊之醴齊訖次詣第二室酌尊所如上儀詣始祖神  
位前樂作北向立搢笏跪執事者以爵授亞獻亞獻執  
爵三祭酒于茅苴奠爵執笏俛伏興出戶外北向再拜  
訖樂止次詣每室行禮並如上儀降階樂作復位樂止  
禮直官次引終獻詣盥洗及升殿行禮並如亞獻之儀

令闔戶以降太常藏祝版於櫃光祿以胙奉進監祭御史就位展視光祿卿望闕再拜乃退其七祀夏竈中雷秋門厲冬行鋪設祭器入實酒饌俟終獻將升獻獻官行禮并讀祝文并每歲四孟月臘五享並如上儀

金史卷三十